

* * *

ხომალდს მიჰყვება თოვლის მადონა
და ყვავილები გიჟადონა.
შენთვის გაეკრა ცვარზე იესო,
სულო, ჭაობზე უნოტიესო.
იდუმალა ჩვენი სერობა
და ღამეების აღმაცერობა,
რომ ოცნებები ცეცხლით გალესო.
სულო, იმ ცეცხლზე უმხურვალესო
დღეთა სინაზეს ედება კორძი...
ესე არს სისხლი, ესე არს ხორცი
და იდუმალი ლოცვა ბაგისა,
სულო, ლაჟვარდზე უსპეტაკესო.
ვარსკვლავი იგი - ფიქრთა საგანი,
ერთი უმრავლეს ვარსკვლავთაგანი,
აელვარდება ცაზე ოდესმე,
სულო, დემონზე უბოროტესო!